

SLUŽBENI GLASNIK

UNSKO-SANSKOG KANTONA

Godina XIII - Broj 16

16. oktobra 2009. godine, Bihać

Izdanje na bosanskom jeziku

Na osnovu člana 2 b) poglavlja IV Ustava Unsko-sanskog kantona ("Službeni glasnik Unsko-sanskog kantona", broj: 1/04 i 11/04), Skupština Unsko-sanskog kantona, na 42. sjednici održanoj 23. septembra 2009. godine, donosi

ZAKON O UNIVERZITETU U BIHAĆU

GLAVA PRVA - OPĆE ODREDBE

Član 1.

(Sadržaj Zakona)

Ovim Zakonom uređuju se pitanja vezana za status Javne ustanove "Univerzitet u Bihaću" (u daljem tekstu: Univerzitet), a naročito:

- osnivač, naziv, pravni status, sjedište, obilježja i Statut,
- djelatnost,
- imovina,
- unutrašnja organizacija Univerziteta,
- organi Univerziteta,
- organi organizacionih jedinica,
- finansiranje Univerziteta i
- nadzor

Član 2.

(Osnivač)

- Osnivač Univerziteta u Bihaću je Skupština Unsko-sanskog kantona (u daljem tekstu: Skupština Kantona).
- Skupština Kantona vrši prava i dužnosti osnivača Univerziteta, preuzete Zakonom o Univerzitetu u Bihaću ("Službeni glasnik Unsko-sanskog kantona", br. 8/98 i 8/06).

Član 3.

(Naziv)

- Naziv Univerziteta glasi: Javna ustanova "Univerzitet u Bihaću" - "Universitas studiorum Bihigiensis".
- Skraćeni naziv glasi: "Univerzitet u Bihaću".

Član 4.

(Pravni status)

- Univerzitet u Bihaću je Javna ustanova u državnoj svojini sa svojstvom pravnog lica, koja svoju djelatnost obavlja kao javnu službu.
- U okviru registrovane djelatnosti, Univerzitet ima sva prava i obaveze u pravnom prometu sa trećim licima.
- Univerzitet u Bihaću, organiziran prema odredbama ovog Zakona, je pravni sljednik Univerziteta u Bihaću osnovanog 28. jula 1997. godine na osnovu Zakona o Univerzitetu ("Službeni list SRBiH", broj: 39/9), Zakona o visokoškolskim ustanovama u državnoj svojini USK ("Službeni list USK", broj: 1/96), te Odluke Skupštine USK o davanju saglasnosti na Ugovor o udruživanju u Univerzitet u Bihaću broj: 01-1-88/97 od 28. jula 1997. godine i prema Zakonu o Univerzitetu u Bihaću ("Službeni glasnik", broj: 8/98), kao i njegovih članica udruženih u Univerzitet, a sada organizacionih jedinica Univerziteta u Bihaću.

Član 5.

(Sjedište)

Sjedište Univerziteta je u Bihaću, Pape Ivana Pavla II, br. 2/2.

Član 6.

(Pečat, znak, žig i štambilj)

- (1) Univerzitet ima pečat okruglog oblika, prečnika 50 mm, sa slijedećim tekstom: UNIVERZITET U BIHAĆU-UNIVERSITAS STUDIORUM BIHIGIENSIS MCMXCVII, sa znakom Univerziteta u sredini pečata, ispisanim latiničnim i ćirilničnim pismom.
- (2) Univerzitet ima mali pečat, prečnika 20 mm, istog oblika i sadržaja kao i pečat iz stava (1) ovog člana.
- (3) Univerzitet ima suhi žig za ovjeru diplome i drugih odgovarajućih dokumenata, sa oblikom, veličinom i sadržajem iz stava (1) ovog člana.
- (4) Univerzitet može imati znak, kao i druge simbole, u skladu sa Statutom.
- (5) Bliže odredbe o broju pečata i načinu njihovog korištenja i čuvanja utvrđuju se općim aktom Univerziteta u skladu sa Zakonom.

Član 7.

(Pečat organizacionih jedinica)

- (1) Organizaciona jedinica Univerziteta ima pečat u skladu sa Statutom.
- (2) Pečat organizacione jedinice sadrži tekst pečata i naziv organizacione jedinice.

Član 8.

(Statut)

Statut je osnovni opći akt Univerziteta.

GLAVA DRUGA - DJELATNOST

Član 9.

(Djelatnost)

- (1) Djelatnost Univerziteta je:
 - a) 80.302 - visoko obrazovanje,
 - b) 80.420 – obrazovanje odraslih i ostalo obrazovanje na drugom mjestu nepomenuto - d.n. (obrazovanje tokom čitavog života),
 - c) 22.110 - izdavanje knjiga,
 - d) 22.120 -izdavanje novina,
 - e) 22.130 - izdavanje časopisa i sličnih periodičnih izdanja,
 - f) 22.140 - izdavanje zvučnih zapisa,
 - g) 22.150 - ostala izdavačka djelatnost i
 - h) 55.233 - studentski domovi
- (2) U okviru djelatnosti visokog obrazovanja, Univerzitet u Bihaću obavlja naučno-istraživačku, umjetničku, ekspertsko-konsultantsku i izdavačku djelatnost, a može obavljati i druge poslove kojima se komercijalizuju rezultati naučno - istraživačkog rada, pod uslovom da se tim poslovima ne ugrožava kvalitet nastave, što će biti precizirano Statutom.
- (3) Univerzitet obavlja djelatnost neposredno ili preko svojih organizacionih jedinica.
- (4) Ostale djelatnosti Univerziteta precizirat će se Statutom.

GLAVA TREĆA - IMOVINA UNIVERZITETA

Član 10.

(Imovina Univerziteta)

- (1) Imovinu Univerziteta čine nepokretne stvari, pokretne stvari, novac i prava osigurana od osnivača, kao i imovina koja je stečena obavljanjem djelatnosti i na drugi način u skladu sa Zakonom.
- (2) Univerzitet stječe, upravlja i koristi svoju imovinu u skladu sa Zakonom.

Član 11.

(Ovlaštenja i odgovornost)

- (1) Univerzitet istupa u pravnom prometu samostalno, u okviru ovlaštenja utvrđenih Zakonom.
- (2) Za svoje obaveze Univerzitet odgovara svom svojom imovinom (potpuna odgovornost).
- (3) Osnivač je supsidijarno odgovoran za obaveze Univerziteta.

Član 12.

(Višak prihoda)

Višak prihoda nad rashodima Univerzitet koristi za unapređenje i razvoj djelatnosti zbog koje je osnovan.

GLAVA ČETVRTA - UNUTRAŠNJA ORGANIZACIJA UNIVERZITETA

Član 13.

(Organizacione jedinice)

- (1) U sastavu Univerziteta ustanovljavaju se organizacione jedinice bez svojstva pravnog lica.
- (2) Prava, obaveze i odgovornosti, broj i naziv organizacione jedinice, ovlaštenja u pravnom prometu i druga pitanja odnosa Univerziteta i organizacione jedinice utvrđuju se ovim Zakonom i Statutom.
- (3) Organizacione jedinice upisuju se u Sudski registar.
- (4) Organizacione jedinice koje su organizovane na Univerzitetu su:
 - a) Ekonomski fakultet (osnovan Odlukom Skupštine USK broj: 01-1-85/98 od 9. jula 1998. godine),
 - b) Pravni fakultet (osnovan Odlukom Skupštine USK broj: 01-1-86/98 od 9. jula 1998. godine),
 - c) Pedagoški fakultet (osnovan Odlukom Skupštine USK broj: 01-1-84/98 od 9. jula 1998. godine),
 - d) Tehnički fakultet (Mašinski fakultet osnovan Odlukom Skupštine USK broj: 01-5/96 od 10. februara 1996. godine, transformiran u Tehnički fakultet Odlukom Skupštine USK broj: 01-1-96/99 od 21. jula 1999. godine),
 - e) Biotehnički fakultet (osnovan Odlukom Skupštine USK broj: 01-1-83/98 od 9. jula 1998. godine) i
 - f) Visoka zdravstvena škola (osnovana kao Viša medicinska škola Odlukom Skupštine USK broj: 01-1-87/98 od 9. jula 1998. godine, a preimenovana u Visoku zdravstvenu školu uz saglasnost Kantonalnog ministarstva obrazovanja, nauke, kulture i sporta broj: 10-05-8923-UP-1-2/06 od 18. oktobra 2006. godine).
- (5) Islamski pedagoški fakultet (Ugovor o udruživanju broj: 15/1. 612-52/97 od 30. juna 1997. godine) ostaje u sastavu Univerziteta čiji je status regulisan navedenim ugovorom.
- (6) Univerzitet može ustanoviti i druge organizacione jedinice u skladu sa Statutom.

Član 14.

(Ovlaštenja u pravnom prometu)

- (1) Organizacione jedinice Univerziteta imaju određena ovlaštenja u pravnom prometu, kao i poseban obračun rezultata poslovanja u skladu sa Statutom.
- (2) U pravnom prometu sa trećim licima organizacione jedinice istupaju pod nazivom Univerziteta i svojim nazivom, u skladu sa Statutom.

GLAVA PETA – ORGANI UNIVERZITETA

Član 15.

(Organi Univerziteta)

- (1) Organi Univerziteta su: Upravni odbor, Senat i rektor.
- (2) Organi iz stava (1) ovog člana mogu osnivati stručne komisije i druga savjetodavna i stručna tijela.

Član 16.

1. Upravni odbor

- (1) Organ upravljanja Univerziteta je Upravni odbor.
- (2) Upravni odbor Univerziteta ima devet članova, i to pet predloženih od Osnivača u javnoj i transparentnoj konkursnoj proceduri i četiri iz reda akademske zajednice u javnoj i transparentnoj konkursnoj proceduri koju provodi Senat.
- (3) Predsjednik Upravnog odbora imenuje se iz reda Osnivača.
- (4) Mandat članova Upravnog odbora je četiri godine.
- (5) Konačno imenovanje članova Upravnog odbora vrši Senat.
- (6) Bliža pitanja vezana za početak i način rada, prava i obaveze Upravnog odbora uredit će se Statutom.

Član 17.

(Izuzeca)

- (1) Rektor, prorektor, rukovodilac organizacione jedinice Univerziteta i članovi Senata ne mogu biti članovi Upravnog odbora.
- (2) Za člana Upravnog odbora ne može biti imenovano lice u radnom odnosu u organima koji vrše nadzor nad provođenjem zakona iz oblasti visokog obrazovanja i nadzor nad zakonitošću rada visokoškolskih ustanova, direktor javne ustanove koju osniva Kanton, direktor kantonalnog vanbudžetskog fonda, kao ni druga lica u skladu sa Zakonom i drugim propisima.

Član 18.

(Razrješenje člana Upravnog odbora)

- (1) Senat može razriješiti člana Upravnog odbora i prije vremena na koje je imenovan u skladu sa Zakonom i Statutom.
- (2) Prijevremeno razrješenje člana Upravnog odbora bliže se uređuje Statutom.

Član 19.

(Djelokrug poslova Upravnog odbora)

- (1) Upravni odbor obavlja poslove utvrđene Zakonom i Statutom.
- (2) Nadležni organi su dužni obezbijediti Upravnom odboru tražene i druge relevantne informacije i dokumentaciju vezanu za rad Univerziteta.

Član 20.

(Naknada za rad članovima Upravnog odbora)

Članovima Upravnog odbora Univerziteta pripada naknada za rad u Upravnom odboru u visini koju utvrđuje Vlada Kantona.

Član 21.

2. Senat

- (1) Senat je najviše izborno akademsko tijelo koje se bira iz reda akademskog osoblja i studenata iz sva tri (3) ciklusa u skladu sa Zakonom i Statutom.
- (2) Broj članova, sastav i način rada Senata utvrđuje se Statutom.
- (3) Svaka organizaciona jedinica je zastupljena najmanje jednim članom u Senatu u skladu sa Statutom.

Član 22.

(Nadležnost Senata)

- (1) Senat Univerziteta odlučuje o svim akademskim pitanjima u okviru ovlaštenja utvrđenih Zakonom, a posebno:
 - a) o pitanjima nastavne, naučne, umjetničke i stručne djelatnosti Univerziteta;
 - b) donosi Statut, uz prethodno pribavljeno mišljenje Upravnog odbora;
 - c) donosi Etički kodeks u skladu sa Zakonom i Statutom;
 - d) donosi opće akte u skladu sa Zakonom i Statutom;
 - e) donosi nastavne planove i nastavne programe svih ciklusa studija;
 - f) bira i razrješava rektora i prorektore Univerziteta;
 - g) daje saglasnost na izbor dekana/direktora organizacione jedinice;
 - h) bira akademsko osoblje na prijedlog nastavno-naučnog vijeća organizacione jedinice;
 - i) prati realizaciju razvoja visokoškolske ustanove sa stanovišta ostvarivanja nastavnog, naučno-nastavnog, umjetničkog, umjetničko-nastavnog, umjetničko--istraživačkog i stručnog rada putem analize izvještaja rukovodilaca organizacionih jedinica i na druge načine;
 - j) predlaže Upravnom odboru godišnji program rada visokoškolske ustanove;
 - k) razmatra prijedloge organizacionih jedinica o realizaciji studija u saradnji sa domaćim i stranim visokoškolskim ustanovama koje mogu imati za rezultat izdavanje dvojnih ili zajedničkih diploma;
 - 1) imenuje komisije u postupku stjecanja doktorata nauka na prijedlog nastavno--naučnog vijeća, odnosno umjetničko--nastavnog vijeća i odlučuje o izvještajima tih komisija i imenuje mentora;
 - l) dodjeljuje počasno zvanje "profesor emeritus", te "počasni doktor nauka";
 - m) podnosi prijedlog Upravnom odboru za organiziranje i ukidanje fakulteta i drugih organizacionih jedinica Univerziteta;
 - n) odobrava razvojne i organizacione planove;
 - o) imenuje svoja stalna ili privremena tijela, radne grupe, komitete, grupe za praćenje kvaliteta rada i slično;
 - p) propisuje odredbe kojima se regulira rad organa koje on imenuje;
 - q) predlaže upisnu politiku resornom ministarstvu u skladu sa potrebama tržišta rada i
 - r) obavlja druge poslove u skladu sa Zakonom i Statutom.
- (2) Senat Univerziteta odlučuje o akademskim pitanjima na prijedlog stručnih organa organizacionih jedinica, kao i drugih organa i predstavničkih tijela studenata.

Član 23.

3. Rektor

- (1) Organ rukovođenja Univerziteta je rektor, koji se bira u proceduri javnog konkursa.
- (2) Za rektora može biti izabran nastavnik u naučno--nastavnom zvanju redovnog profesora, koji ispunjava uslove za to zvanje na Univerzitetu.
- (3) Rektora bira i razrješava Senat tajnim glasanjem natpolovičnom većinom od ukupnog broja članova Senata, na mandat od četiri godine i može biti ponovo izabran još jedan mandat.
- (4) Rektor se bira i razrješava u skladu sa uslovima i postupkom propisanim ovim Zakonom.
- (5) Za rektora ne može biti izabrano lice koje ima funkciju u izvršnim organima političke stranke.

Član 24.

(Vršilac dužnosti rektora)

Ako je pozicija rektora, prije isteka perioda na koji je izabran, ostala upražnjena iz ličnih ili drugih razloga, Senat Univerziteta iz svojih redova bira vršioca dužnosti rektora (u zvanju vanrednog ili redovnog profesora), koji obavlja dužnost do izbora novog rektora, najduže šest (6) mjeseci.

Član 25.

(Ovlaštenja)

Rektor ne može bez prethodne saglasnosti Upravnog odbora sklapati poslove o stjecanju, opterećenju ili otuđenju imovine, kao ni raspolagati sredstvima preko iznosa utvrđenog Zakonom i Statutom.

Član 26.

(Djelokrug)

Rektor obavlja poslove utvrđene Zakonom o visokom obrazovanju i Statutom.

Član 27.

(Odgovornost)

- (1) Rektor je odgovoran za zakonitost rada Univerziteta.
- (2) Rektor za svoj rad u domenu akademskih pitanja odgovara Senatu, a u domenu poslovanja Upravnom odboru.
- (3) Rektor jednom godišnje podnosi Senatu izvještaj o svom radu u domenu akademskih pitanja početkom akademske godine za prethodnu akademsku godinu, a Upravnom odboru izvještaj o svom radu početkom kalendarske godine za prethodnu godinu.

Član 28.

(Razrješenje)

- (1) Pored slučajeva utvrđenih Zakonom, rektor može biti razriješen dužnosti i prije isteka vremena na koje je imenovan u slučaju ozbiljnog kršenja odredbi Statuta i drugih općih akata Univerziteta, kršenja Zakona i drugih propisa, ako ostvaruje loše poslovne rezultate i ne izvršava zadatke predviđene Zakonom, drugim propisom ili Statutom, ili ih izvršava protivno njima, ili prekorači ovlaštenja, ako bude pravosnažno osuđen za krivično djelo, ako svojim ponašanjem povrijedi ugled i dužnost koju vrši, izgubi sposobnost obavljanja dužnosti rektora, zbog odsutnosti ili spriječenosti da u periodu dužem od tri mjeseca obavlja dužnost rektora i u drugim slučajevima predviđenim Zakonom i Statutom.
- (2) Prijedlog za razrješenje rektora Univerziteta može dati osnivač, jedna trećina (1/3) članova Senata, najmanje tri nastavno-naučna, odnosno umjetničko-nastavna vijeća organizacionih jedinica i natpolovična većina ukupnog broja članova Upravnog odbora.

Član 29.

(Obustavljanje općeg i pojedinačnog akta)

- (1) Rektor Univerziteta dužan je da obustavi od izvršenja opći akt donesen na Univerzitetu koji nije u saglasnosti sa Ustavom ili je u suprotnosti sa Zakonom i drugim propisima, kao i izvršavanje pojedinačnog akta kojim se nanosi šteta Univerzitetu ili društvenoj zajednici, i da o tome obavijesti, u roku od sedam (7) dana od dana donošenja odluke, Senat, odnosno Upravni odbor u skladu sa njihovim nadležnostima, kao i organ uprave koji vrši nadzor nad zakonitošću rada visokoškolske ustanove.
- (2) Rektor je dužan upozoriti dekana i ostale rukovodioce na Univerzitetu na protivzakonitost ili protivustavnost njihovih donesenih odluka i o tome obavijestiti Senat i nastavno - naučno odnosno umjetničko --nastavno vijeće organizacione jedinice.

Član 30.

(Prorektori)

- (1) Rektor u radu pomažu prorektori, koje bira i razrješava Senat tajnim glasanjem nakon provedene procedure javnog konkursa.
- (2) Broj, uslovi izbora i razrješenja i ovlaštenja prorektora bliže se uređuju Statutom.
- (3) Za prorektora ne može biti izabrano lice koje ima funkciju u izvršnim organima političke stranke, kao ni drugo lice utvrđeno Statutom.
- (4) Rektor/rektorica i prorektor/prorektorica u toku mandata ne mogu vršiti funkciju dekana/direktora ili prodekana organizacione jedinice, kao ni člana Upravnog odbora visokoškolske ustanove.

GLAVA ŠESTA - ORGANI ORGANIZACIONIH JEDINICA

Član 31.

(Organi organizacionih jedinica Univerziteta)

- (1) Organi organizacionih jedinica Univerziteta su:
 - a) nastavno-naučno, odnosno nastavno - umjetničko vijeće;
 - b) dekan/direktor.
- (2) Organizacione jedinice iz stava (1) ovog člana mogu imati i druge organe, što se uređuje Statutom.

Član 32.

(Nastavno-naučno i nastavno-umjetničko vijeće)

- (1) Nastavno-naučno, odnosno nastavno--umjetničko vijeće je akademsko tijelo kojeg čine nastavnici i saradnici koji su u radnom odnosu na Univerzitetu koji učestvuju u nastavno-naučnom procesu organizacione jedinice, kao i studenti izabrani od studentskog predstavničkog organa, u skladu sa Statutom.
- (2) Nastavno-naučno, odnosno nastavno - umjetničko vijeće:
 - a) predlaže nastavni plan i program za organizacionu jedinicu kao dio integralnog nastavnog plana i programa Univerziteta;
 - b) donosi odluke o akademskim, naučnim, umjetničkim i stručnim pitanjima na nivou organizacione jedinice;
 - c) obrazuje komisije u postupku stjecanja naučnog stepena magistra i imenuje mentora i predlaže komisiju u postupku stjecanja naučnog stepena doktora nauka i predlaže mentora;
 - d) bira i razrješava dekana/direktora u javnoj i transparentnoj konkursnoj proceduri koju sprovodi organizaciona jedinica uz saglasnost Senata;
 - e) bira prodekana i predstavnika u Senatu tajnim glasanjem natpolovičnom većinom svih članova vijeća;
 - f) odlučuje o prigovorima studenata na odluku dekana o pojedinačnim pravima, obavezama i odgovornostima studenata i
 - g) obavlja i druge poslove u skladu sa Zakonom i Statutom.

Član 33.

(Dekan/direktor)

- (1) Dekan/direktor organizuje i rukovodi radom i predstavlja i zastupa organizacionu jedinicu Univerziteta, a posebno:
 - a) saziva i predsjedava sjednicama nastavno--naučnog vijeća, odnosno nastavno--umjetničkog vijeća organizacione jedinice;
 - b) predlaže rektoru unutrašnju organizaciju i sistematizaciju radnih mjesta organizacione jedinice;
 - c) odlučuje u prvom stepenu o pojedinačnim pravima studenata;
 - d) odlučuje i snosi odgovornost za korištenje sredstava kojima raspolaže organizaciona jedinica u skladu sa općim aktom Univerziteta;
 - e) naredbodavac je za izvršenje finansijskog plana koji se odnosi na organizacionu jedinicu u skladu sa Statutom i
 - f) obavlja druge poslove utvrđene Statutom.
- (2) Dekan može raspolagati sredstvima organizacione jedinice do iznosa utvrđenog Statutom.

Član 34.

(Izbor dekana/direktora)

- (1) Dekana/direktora bira i razrješava nastavno--naučno, odnosno nastavno-umjetničko vijeće organizacione jedinice, uz saglasnost Senata.
- (2) Za dekana/direktora može biti izabran nastavnik u nastavničkom zvanju u skladu sa Zakonom o visokom obrazovanju.
- (3) Dekana/direktora se bira na četiri godine po proceduri javnog konkursa i može biti ponovo izabran još jedan mandat.

- (4) Uslovi i postupak izbora i razrješenja dekana/ direktora bliže se uređuju Statutom.
- (5) Za dekana/direktora ne može biti izabrano lice koje ima funkciju u izvršnim organima političke stranke, kao ni drugo lice utvrđeno Statutom.
- (6) Za vrijeme trajanja mandata, dekan/direktor zasniva radni odnos na Univerzitetu sa punim radnim vremenom.

Član 35.

(Razrješenje dekana/direktora)

Dekan/direktor može biti razriješen prije isteka perioda na koji je izabran, uz saglasnost Senata, u slučajevima:

- a) ako ostvaruje loše poslovne rezultate,
- b) ako bude osuđen za krivično djelo,
- c) ako ne izvršava zadatke utvrđene Zakonom, osnivačkim aktom i Statutom, ili ih izvršava protivno njima, ili prekorači ovlaštenja,
- d) zbog odsutnosti ili spriječenosti da u periodu dužem od tri mjeseca obavlja dužnost dekana/ direktora,
- e) ako svojim ponašanjem povrijedi ugled funkcije dekana/direktora,
- f) ako mu nastavno-naučno vijeće, odnosno nastavno-umjetničko vijeće iskaže nepovjerenje, tajnim izjašnjavanjem dvotrećinskom većinom i
- g) u drugim slučajevima utvrđenim Zakonom i Statutom.

Član 36.

(Prodekani)

- (1) Dekanu u radu pomažu prodekani.
- (2) Broj prodekana, uslovi i postupak izbora i razrješenja, kao i njihova prava i obaveze utvrđuju se Statutom.

Član 37.

(Organi drugih organizacionih jedinica)

- (1) Institut, kao naučno -istraživačka organizaciona jedinica, ima Stručno vijeće i direktora.
- (2) Institut može imati i druge organe u skladu sa Statutom.
- (3) Druge organizacione jedinice Univerziteta, kao i njihove podorganizacione jedinice, imaju svoje organe u skladu sa Statutom.

Član 38.

(Sadržaj Statuta)

Pored odredbi utvrđenih Zakonom, Statut Univerziteta sadržava odredbe o stručnim i drugim organima organizacionih jedinica Univerziteta, postupku i uslovima njihovog obrazovanja i popunjavanja, sastavu, broju članova i nadležnosti tih organa.

GLAVA SEDMA - FINANSIRANJE UNIVERZITETA

Član 39.

(Finansiranje Univerziteta)

- (1) Univerzitet stječe sredstva za obavljanje svoje djelatnosti:
 - a) iz sredstava osnivača;
 - b) upisnina, školarina koju plaća student/ studentica;
 - c) uplata za obavljanje intelektualnih i drugih usluga;
 - d) sredstava od izdavačke djelatnosti;
 - e) sredstava osiguranih realizacijom naučno-istraživačkog rada, te izradom stručnih i konsultantskih projekata;
 - f) pružanjem usluga u nastavi drugim visokoškolskim institucijama;
 - g) prodaje dokumenata koji se koriste za upis (indeksi i upisni materijal) i dokumenata koji se koriste u toku studija i diplomiranja;

- h) donacija, naslijeđa, darova;
 - i) legata, poklona i zavještanja;
 - j) kredita i
 - k) drugih Zakonom dozvoljenih izvora.
- (2) Sva novčana sredstva pripadaju Univerzitetu i troše se u skladu sa Zakonom, podzakonskim aktom, Statutom i usvojenim finansijskim planom.
- (3) Organizaciona jedinica Univerziteta može stjecati sredstva iz stava (1) ovog člana u skladu sa Zakonom i Statutom Univerziteta.
- (4) Sredstva iz stava (1) ovog člana se iskazuju i evidentiraju u skladu sa trezorskim poslovanjem.
- (5) Senat utvrđuje upisne kvote i donosi odluku o visini školarine, koju plaćaju studenti na Univerzitetu, uz prethodnu saglasnost Vlade Kantona.

Član 40.

(Vlastiti prihodi)

- (1) Vlastiti prihodi Univerziteta, koji su kao takvi definisani posebnim propisima, raspodjeljuju se na način i u rokovima utvrđenim posebnim propisima, Statutom i usvojenim finansijskim planom Univerziteta.
- (2) Kriterije za raspored sredstava koja Univerzitet ostvaruje iz vlastitih prihoda na organizacione jedinice Univerziteta donosi Upravni odbor Univerziteta u skladu sa Zakonom i Statutom.

Član 41.

(Interna kontrola i revizija)

Univerzitet uspostavlja internu kontrolu i internu reviziju poslovanja u skladu sa Zakonom.

GLAVA OSMA - NADZOR

Član 42.

(Nadzor)

- (1) Nadzor nad provođenjem ovog Zakona i propisa donesenih za njegovo provođenje vrši Ministarstvo obrazovanja, nauke, kulture i sporta.
- (2) Nadzor se vrši na način koji ne narušava autonomiju Univerziteta i ne ometa njegov redovan rad.

GLAVA DEVETA - PRELAZNE I ZAVRŠNE ODREDBE

Član 43.

(Pravo na završetak studija)

- (1) Studenti upisani na dodiplomski i postdiplomski studij na dan stupanja na snagu ovog Zakona imaju pravo završiti studij prema nastavnom programu i uslovima koji su važili prilikom upisa u prvu godinu studija i steći odgovarajući stručni, odnosno naučni naziv prema propisima koji su važili prije stupanja na snagu ovog Zakona.
- (2) Student koji je do stupanja na snagu ovog Zakona izgubio pravo na dalje redovno studiranje može nastaviti studij uz obavezu plaćanja troškova studija ukoliko je organizaciona jedinica u mogućnosti da organizira nastavak studija.
- (3) Pravo na završetak studija po ovom članu ograničava se završetkom akademske 2012/2013. godine.

Član 44.

(Pravo na reizbor)

- (1) Viši asistent koji je to zvanje stekao prema odredbama Zakona o Univerzitetu u Bihaću ("Službeni glasnik Unsko-sanskog kantona", br. 8/98 i 8/06) i koji je u radnom odnosu na Univerzitetu u Bihaću ima pravo na još jedan reizbor po propisima i uslovima koji su važih do dana stupanja na snagu ovog Zakona.

Član 45.

(Mandat članova Upravnog odbora)

- (1) Senat Univerziteta će imenovati upravni odbor Univerziteta u skladu sa ovim Zakonom, u roku od 90 dana od dana stapanja na snagu ovog Zakona.
- (2) Do konačnog imenovanja Upravnog odbora u skladu sa ovim Zakonom, Vlada Unsko--sanskog kantona će imenovati privremeni Upravni odbor Univerziteta.

Član 46.

(Mandat rektora i prorektora Univerziteta, dekana i prodekana fakulteta)

Rektor i prorektori Univerziteta, te dekani i prodekani fakulteta izabrani prije stupanja na snagu ovog Zakona ostaju na istoj dužnosti do izbora organa Univerziteta i organizacionih jedinica u skladu sa ovim Zakonom, odnosno do upisa Univerziteta u Sudski registar.

Član 47.

(Rok za donošenje statuta)

- (1) Upravni odbor Univerziteta, zatečen na dužnosti na dan stapanja na snagu ovog Zakona, će donijeti statut Univerziteta u Bihaću u roku od 30 dana od dana njegovog stapanja na snagu.
- (2) Univerzitet je dužan uskladiti svoju organizaciju, rad, opće akte i ugovore o radu sa odredbama Zakona o visokom obrazovanju ("Službeni glasnik Unsko-sanskog kantona", broj: 8/09) najkasnije u roku od devet mjeseci od dana njegovog stapanja na snagu.

Član 48.

(Osnov za upis u Sudski registar)

- (1) Ovaj Zakon je pravni osnov za upis promjena u Sudskom registru i Registru ustanova.
- (2) Upisom u Sudski registar brišu se upisi integriranih ustanova po osnovu ugovora o udruživanju u Univerzitet u Bihaću navedenih u članu 13. ovog Zakona, osim Islamskog pedagoškog fakulteta u Bihaću, čiji je osnivač Sabor Islamske zajednice u Bosni i Hercegovini.

Član 49.

(Prestanak primjene ranijih propisa)

Stupanjem na snagu ovog Zakona prestaje primjena Zakona o Univerzitetu u Bihaću ("Službeni glasnik Unsko-sanskog kantona", br. 8/98 i 8/06).

Član 50.

(Stupanje na snagu)

Ovaj Zakon stupa na snagu osmog dana od dana objavljivanja u "Službenom glasniku Unsko--sanskog kantona".

Broj: 01 -02-1 -410/09
23. septembra 2009. godine
Bihać

Predsjedavajući Skupštine
Unsko-sanskog kantona
Admir Hadžipašić dipl. iur.